

( S'orologu )

So costruidu de variu metallu  
E cun arte sublime e fine ingegnu...  
De complicadu e fragile cungegnu  
Trabaglio notte e die senza fallu;

Mi proteggit sa cara unu cristallu,  
Un'aneddu mi faghet de sustegnu;  
So tantu utile, vivo in ogni regnu,  
E mi dan s'alimentu a intervallu....

So cun duas lanxittas bene armadu  
Chi lis dat sa corona ordine e mottu  
In oras de trabagliu e de riposu....

E cun su passu meu reguladu  
Mustro costantemente e naro a tottu:  
Cantu siat su tempus preziosu....

Fiduciosu.

( VIRTUOSA E BELLA )

Non resessin sos ojos de su mundu  
A legger custa mistica iscrittura  
Chi de su coro meu in su profundu  
Si b'incontrat incisa pro natura,  
Da'sos effettos de unu giocundu  
Visu simile angelica figura...  
Cale est su tou chi sa terra bantat  
Chisolu a vista ogni mortale incantat.

Su tou est unu visu incantadore  
Perfettamente a su significadu;  
Giustu est narrer chi s'altu Criadore  
De te fattu happet domu a su Criadu;  
Ca ti pioet da'ogni ala amore  
In sas suas virtudes delicadu...  
Amore santu, costante e gentile,  
Teneru e puru che rosa in abriale.

Tenera ses e bella a tale puntu,  
Ma Deus, pro ti fagher pius bona,  
Atteruna virtude t'hat aggiuntu,  
Chi faghet a sas atteras corona:  
De s'umiltade t'hat su balsamu untu,  
Cun custa 'e tottu-cantas ses padrona...  
E senza t'abizzare ad ogni istante,  
Ses de tottu sos coros dominante....

Tottu sos chi hana fortuna 'e ti mirare  
Non sun padronos de sa forza insoro;  
Nè poden mexus cosa disizare  
De su chi hana a dananti altu tesoro;  
Nè s'allontanen senza suspirare...  
Nè senza ischire chi perden su coro,  
E chi sas gias de sas portas suas  
Sunu in possessu de sas manos tuas.

Inue àbitas tue o chi ti dignas  
De visitare logu bellu o feu,  
Parit chi pro incantu bi cunsignas  
Tottu sos donos chi t'hat dadu Deu...  
In te finzas sas limbas pius malignas,  
Perden s'insoro solitu recreu...  
Tue passizzas?..mudas sas campagnas,  
Tue aggiunghes onore a sas cumpagnas...

Fiduciosu.



( SA NOTTE E-I SU DIE )

Antitesi

Nesit su die, cun tonu orgogliosu,  
Eo, da'cando nasco su manzanu:  
Ravvivo duos (regnos) vigorosu,  
E ponzo in motu ogni essere mundanu.....

Nesit sa notte: su dulce riposu  
Eo cunzedo ad ogni cristianu,  
Sutta su mantu meu tenebrosu,  
E so sa Mama 'e su genere unanu...

Nesit su die: tenzo in cumpagnia  
Su sole, chi dat lughe a'custu mundu...  
E tue isparis a sa vista mia.

Nesit sa notte: non podes intreu  
Su globo illuminare proite est tundu:  
A mes'a pare nos l'hat dadu Deu!...

Fiduciosu.